

周易詳說

周易詳說卷之二

三原劉紹攽著

論本義

周易上經 本義曰、以其簡袞重大故分爲上下兩篇、按正義云陽道純而奇故上篇三十所以象陽也、陰道不純而偶故下篇三十四所以象陰也、程子上下篇義亦謂陽盛者居上、陰盛者居下、今讀序卦上篇之首曰有天地然後萬物生焉、下篇之首曰有天地然後有萬物、上下篇另爲起語不與他卦並敘信乎其有義存焉、非漫然而分之也。

本義曰近世晁氏始正其失而未能盡合古文呂氏又更定著爲經二卷傳十卷乃復孔氏之舊按宋儒稅巽父云呂汲公元豐壬戌昉刻周易古經十二篇於成都學官景迂晁生建中靖國辛巳并爲八篇號古周易繕寫而藏於家朱子謂未盡合古文者漢志稱十二卷晁止八篇故從呂成公定本但言成公而不及汲公想亦未見蜀本也

初九 本義曰陽數九爲老七爲少老變而少不變故謂陽爻爲九按正義云稱九稱六其說有二一者乾體有三畫坤體有六畫陽得兼陰故其數九

陰不得兼陽故其數六二者老陰老陽皆變周易以變者爲占故稱九稱六朱子以象占爲主是以舍前說而從後說

九二 本義曰若有見龍之德則爲利見九五在上之大人按正義云褚氏張氏鄭康成皆以爲九二利見九五之大人是漢儒已有此說

用九 本義春秋傳曰乾之坤曰見羣龍无首吉蓋卽純坤卦辭牝馬之貞先迷後得東北喪明之意按昭二十九年傳秋龍見於絳郊魏獻子問於蔡墨曰周易有之在乾之姤曰潛龍勿用其同人曰

見龍在田其大有曰飛龍在天其夬曰亢龍有悔
其坤曰見羣龍无首吉正義謂傳例雖不用筮但
指此卦某爻之義者卽云此卦之某卦今讀宣十
二年傳知莊子曰在師之臨第占師出以律之辭
襄二十八年傳子太叔曰在復之頤第占迷復凶
之辭則蔡墨所稱止當論羣龍无首不及於孔馬
之貞也焦氏易林乾之姤乾之同人亦如此
彖傳 正義亦以天之元亨利貞聖人之元亨利貞
分言但不如本義之明晰

君子行此四德者 本義傳者欲以明此章之爲古

語按十翼皆孔子所定不聞復有傳者穆姜之言
蓋古有是語而孔子述之耳

四德正義以爲仁禮義信本義以爲仁禮義智以
信主土土王四季不可與四德并列

九四重剛而不中 本義九四非重剛重字疑衍按
李鼎祚謂三居下卦之上四居上卦之下俱非得
中故曰重剛而不中 吳草廬曰九三居下乾之終
接上乾之始九四居上乾之始接下乾之終當重
乾上下之際故皆曰重剛然則重字非衍文也

先迷後得主利 本義先迷後得而主於利此正義

之說也折中曰後得主當以孔子文言爲據蓋坤者地道臣道而乾其主也居先則無主故迷居後則得其所主矣利字應屬下兩句讀言在西南則利於得朋在東北則利於喪朋也

初象 本義按魏志作初六履霜今當從之此文帝紀注太史丞許芝之言按後漢魯恭傳引此云履霜堅水陰始凝也馴致其道至堅永也與今易相合然則魏志所引乃從省文非易之本文也

先迷後得 本義陽得兼陰陰不得兼陽按此乃正義初九疏語其理甚精故朱子引之

後得主而有常 本義主下當有利字余氏苞舒曰
程子以主利爲一句朱子因之故以文言後得主
爲闕文然彖傳後順得常與後得主而有常意正
一律似非闕文也

益言順也 本義古字順慎通用按此當作慎今讀
蒙三之象行不順也升大象君子以順德積小以
高大本義皆謂順當作慎但易之言順多矣蒙五
曰順以巽也上九曰上下順也升四曰王用享于
岐山順事也渙初曰初六之吉順也如此之類不
可勝述又皆不作慎解則此三處亦可不必改字

益順者順其勢之所至也。

大亨貞 本義曰自此以下釋元亨利貞乃用文王
本意按語類元亨利貞至孔子方作四德說後人
不知將謂文王作易便作四德說卽非也如屯卦
所謂元亨利貞者其占爲大亨而利於正初非謂
四德也是用文王本意釋之也。

女子貞不字 程傳謂字育之字本義以字爲許嫁
本之取氏

行不順也 本義曰順當作慎按熊氏良輔云蒙小
象凡三順字只是一意不必以不順爲不慎

雖不當位 本義曰以陰居上是爲當位言不當位
未詳按易例所謂當位不當位者皆就爻位以德
與時之當不當非謂陰陽之位也此爻陰居險極
與困上同故皆曰不當

剛來而得中 本義曰卦變圖自遯而來按卦變圖
二陰之卦皆自遯來蓋六往居三九來居二也然
本義與圓合者惟此一卦而已餘皆不合

或從王事无成 本義曰或出而從上之事則亦必
无成功按程傳謂從上而成不在已與地道无成
而代有終同諸儒皆用此說輔嗣亦然

否臧 本義曰否字先儒多作不按堯典否德孔安國曰否不也

師或輿尸 本義以輿尸爲殘敗本之輔嗣程傳云輿尸衆主也蓋指三也蔣氏悌生曰訓作衆主則與喪子帥師爲反對其義尤切

原筮 輔嗣伊川皆以原爲推原之原本義以原爲再按禮曰未有原左傳原田漢書原廟本草原蚕皆作再解

比吉也 本義曰此三字疑衍文語類曰也字羨當云比吉比輔也郭京王昭素皆謂也字誤增按正

義云比吉也者言相親比而得吉也比輔也者釋比所以得吉其理甚長然則謂衍文字義誤增者皆不可信

比之匪人 本義謂承乘應皆陰語類謂初應四爲比得其人二應五亦爲比得其人惟三乃應上爲比之无首者故爲比之匪人是專以應言也程傳本輔嗣之說謂三所比四陰柔而不中二有應而比初皆不中正匪人也蓋以卦名比故不取應爻而以二四比爻言之但二爻比之自內輔嗣曰二應在五程傳曰二與五爲正應是又以應言也二

既可以應言則三亦可以應言矣。

邑人不誠。折中曰：本義謂不相警備以求必得似以爲求所失之前禽也。語類只作有聞無聲之意。尤爲精切。蓋言王者田獵而近郊之處略不驚擾耳。本義係朱子未修改之書，故其後來講論每有不同者，皆此類也。

尚往也。本義曰：言禽之未極其氣猶上進也。榕村語錄曰：雲者陰氣雲而密，是陰先唱也。若陽入而散之，則氣降而成雨矣。不雨者，以其氣猶尚往也。余按此說亦未明晰。安定胡氏謂陽氣上升，陰氣

不能固蔽則不雨。猶若金甌之氣以物覆之則蒸而爲水。近日宗室德濟齋謂地中蒸濕之氣升至空際冷域爲寒氣所迫則降而爲雨。如人冬月行路口中熱氣爲寒氣所迫則凍而爲冰。二說深得陰陽雨澤之理。由此言之本義所謂其氣上進者乃蒸濕之氣上升無寒氣以迫之故升而不降也。乾爲寒爲冰則寒者天氣陽氣也。兌澤在東南濕熱之方爲暑則蒸濕者澤氣陰氣也。又與小畜互兌象合。兌爲暑乃吳草廬繫辭上傳之說復自道本義曰進復自道程傳曰進復於上乃其

道也。蓋沿輔嗣舊說，輔嗣謂小畜者四畜三也。餘爻不在所畜之列，故以初二爲上進。今按彖曰柔得位而上下應之，則初二亦爲所畜矣。況復者反也。從來無有以復爲上進者，故諸儒訓此爻皆不從傳義。

履虎尾 本義曰：以兌遇乾，和說以跢剛強之後，有履虎尾而不見傷之象，是以乾爲虎也。輔嗣以二爲虎，三爲履，四何以又稱履虎尾？其說抵牾難通。來知德以兌爲虎，按八卦之中惟兌至弱，惟乾至強，則與彖傳柔履剛之義不合。毛西河以一柔履

二四兩剛爲虎。謂在上者爲我所踰在下者爲我所踰。踰與距皆履也。然按之經文止有三四兩爻稱履虎尾。二爲履道坦坦。何得亦謂之虎。合稽衆說。益知本義之不可易也。易例上爲首。下爲尾。既未濟可見。此卦以乾爲虎。四爲尾。三距其後。四踰其際。故二爻獨稱履虎尾。而與他爻無涉。况兌爲柔。乾爲剛。諸儒更無異說。以兌履乾。考之彖傳而適合也。

武人爲于大君。本義比之秦政項籍爲肆暴之象。伊川輔嗣皆同此說。惟王秋山以爲勇猛直前。武

人用之以有爲于大君之事則可。折中曰：王氏之說得之，蓋三非大君之位，且爲于兩字，語氣亦不順也。

泰 本義曰：正月之卦也。按十二月之卦，謂之辟卦。辟者主也。京房卦氣揚雄太玄參同契進陽火退陰符皆用之。唐一行曰：十二月卦出于孟氏章句，蓋術數之流無與易義。

本義曰：又自歸妹來。按卦變圖，三陽之卦皆自泰來，自歸妹來與圖不合。

以其彙 本義曰：郭璞洞林讀至彙字絕句。按正義

云以其彙者彙類也則輔嗣以來已讀至彙字絕句矣郭璞在輔嗣之後

翩翩 折中曰傳義皆以此爻爲小人復來然以彖傳上下交而其志同觀之則四五正當君相之位下交之主兩爻象傳所謂中心願也中以行願也則正所謂志同者也

帝乙歸妹 本義曰帝乙歸妹之時不嘗占得此爻考之經傳旣無所據而歸妹五爻亦有帝乙歸妹之文豈得此又得彼乎大抵爻詞之引古人多矣王用享于岐山箕子之明夷不必皆占得此爻也

本義不言帝乙何人程傳以史謂湯爲天乙亦稱
帝乙蓋本之京房按王伯厚曰帝乙歸妹子夏傳
謂湯之歸妹也京房載湯嫁女之辭曰無以天子
之尊而乘諸侯無以天子之富而驕諸侯陰之從
陽女之順夫本天地之義也往事爾夫必以禮義
苟爽對策引帝乙歸妹言湯以娶禮歸其妹于諸
侯皆以帝乙爲天乙也然按之哀九年傳則帝乙
爲紂父云湯者誤詳見泰卦。

否之匪人 本義曰又自漸卦而來按卦變圖三陰
之卦皆自否來與圖不合

拔茅茹 本義曰小人連類而進之象按易爲君子謀不爲小人謀亦未有小人之道而許以吉亨之理輔嗣曰貞而不謗程傳從之而曰固守其節是也

有命无咎 本義曰命謂天命程傳曰必出于君命項平菴曰命者天之所令君之所造也道之廢興豈非天耶世之治亂豈非君耶合而言之乃見精密

同人曰 本義曰衍文程傳曰此三字美文按正義云稱同人曰猶言同人卦曰

公用亨于天子 本義曰亨春秋傳作享謂朝獻也
上有六五之君虛中下賢故爲享于天子之象是以亨爲燕饗也按僖二十五年傳戰克而王饗吉孰大焉此斷占之辭非卦義也卦義蓋謂不私所有用以享獻於上乃與初之無交害四之匪其彭同意輔嗣曰公用斯位乃得通乎天子之道程傳曰有其富盛必用亨通乎天子深合卦義隨之王用亨于西山升之王用亨于岐山本義皆以亨爲通則此爻不應異解

匪其彭 本義曰彭字音義未詳程傳曰盛貌詩載

驅云汔水湯湯行人彭彭行人盛多之狀雅大明
云駢驢彭彭言武王戎馬之盛也按韻會云彭多
也則程傳爲是

易而無備也 本義曰太柔則人將易之而无畏備
之心程傳同折中曰如此則疑于上下相防矣按
正義云已不私于物惟行簡易無所防備物自畏
之故云易而無備

上九 傳義皆以上九下從六五爲履信思順而尚
賢本於輔嗣按鄭氏思諧曰履信思順又以尚賢
蓋言五也五厥孚交如履信也居尊用柔思順也

上九在上尚賢也。折中曰易中以上九終五爻之義者甚多。鄭氏之說與卦意爻義合。

无不利撝謙。本義曰上而能下其占无不利矣。是以无不利爲一句。撝謙爲一句。程傳曰動作施爲无所不利於撝謙。是總作一句。折中曰觀夫子象傳則程說近是。本義蓋本之輔嗣。

征邑國。本義曰以其質柔无位故可以征已之邑國而已。是謂力不及遠也。程傳曰謂自治其私是言力有餘而不暇及也。按楊龜山云君子行有不得。則反求諸已。當以程說爲是。

朋盍簪。輔嗣以簪爲疾也。王伯厚曰：「侯果始有冠簪之訓，程傳云：簪聚也。本之俟果，本義云：簪聚也。又速也。蓋兩取之。」

貞疾。本義曰：乘九四之剛，衆不附而處勢危，是以五爲見，逼于強臣。夫強臣見逼，未有不敗亡者。與恒不死之義未協。按王童溪云：六五之得九四，得法家拂士也。故雖當豫之時，不得以縱其所樂，惟不得以縱其所樂，則恒不死宜也。本義雖本程傳輔嗣之舊，然不若王氏之善。

隨。本義曰：自困卦九來居初，又自噬嗑九來居五。

自未濟來者兼此二變按圖噬嗑自隨來困與未濟距隨甚遠不相合也

天下隨時 本義曰王肅本時作之今當從之按程傳曰不能亨不得正則非可隨之道豈能使天下隨之乎天下所隨者時也故云隨時

隨時之義大矣哉 本義曰王肅本時字在之字下今當從之按程傳曰君子之道隨時而動從宜適變不可爲典要非造道之深知幾能權者不可與于此也故贊之曰隨時之義大矣哉與豫等諸卦不同諸卦時與義是兩事。

蠱

本義曰卦變自賁來者初上二下自井來者五上上下自旣濟來者兼之按圖蠱自井賁旣濟相距甚遠不能合也

先甲後甲 鄭康成以爲甲前三日取改過自新故用辛也甲後三日取丁寧之義故用丁也本義曰先甲三日辛也後甲三日丁也蓋本於此

幹母之蠱 本義曰九二剛中上應二六子幹母蠱而得中之象是以五爲母也程傳以及後儒皆同此說但五曰幹父之蠱是五又爲子也忽而爲母忽而爲子聖人立言不應顛倒若此按輔嗣曰居

於內中宜幹母事故曰幹母之蠱是以二爲母九爲幹也其義甚善。

臨 本義曰八月謂自復卦一陽之月至遯卦二陰之月此正義何氏從建子陽生至建未爲八月之說也又曰八月謂夏正八月于卦爲觀此褚氏自建寅至建酉爲八月之說也程傳從何氏輔嗣則以建丑至否卦建申爲八月

未順命也 本義曰未詳李厚菴曰臨之長大天之命也君子但知大亨以正之爲天道不知浸長之爲天命也順乎道則有無窮無疆之業順乎命而

消不久矣。是故君子未順命也。

觀 本義曰、觀者有以中正示人而爲人所仰也。榕村語錄曰、因承修周易折中、請得內府宋版本義、觀卦辭下注云、觀者有以示人而爲人所仰也。坊版于示人上皆增入中正二字、如何可通、余嘗以爲疑、今看此、可見坊版誤人不淺。

盥而不薦 本義曰、盥將祭而潔手也、薦奉酒食以祭也。程傳曰、盥手酌鬯鬯於地求神之時、薦謂獻腥獻熟之時也。朱子或問云、盥只是濯手、不是灌鬯。伊川承先儒之誤、蓋本之輔嗣、又云、薦是用事。

了。只是未用事之初。

有孚顚若。問有孚顚若承上文盥而不薦。蓋致其潔清而不輕自用。則信在中而顚然可仰。一說下之人信而仰之。二說孰長曰從後說則合得彖辭下觀而化之義。問前說似好曰當以彖辭爲定。按後說本之輔嗣實不若前說之善。林次崖曰盥而不薦就祭祀上說。則有孚顚若亦是就祭祀上詭爲觀之意。則在言表。

觀我生進退。本義曰我生我之所行也。程傳曰我之所生謂動作施爲出於己者。正義曰我生我身

所動出此程傳所由本然不如本義蓋我生我之平生謂德行也

觀其生 本義謂不當事任而亦爲下所覩但以我爲其小有主賓之異伊川輔嗣皆同此說折中謂承九五之意而終言之九五正當君位故曰我生上非君位但以君道論之故曰其

噬嗑 本義曰本自益卦六四之柔上行以至於五而得其中按圖噬嗑自益來益又自噬嗑來

雷電噬嗑 本義曰雷電當作電雷程傳曰象无倒置者疑此文互也按泰卦地在天上而象曰天地

交則電雷亦可作雷電也

噬膚 本義曰祭有膚鼎蓋肉之柔脆按輔嗣以膚爲柔脆之物未經指實程傳以膚爲肌膚然天下豈有齧人之肌膚者不若本義之善但本義以滅鼻爲傷滅其鼻世豈有食肉而傷鼻者則程傳以滅爲深入而沒其鼻者是矣

得金矢 本義曰周禮入鈞金束矢後聽之按人情有所不得已而爲訟藉此索金乃王莽貪婪之政豈聖王哀矜惻恒之意哉程傳曰金取剛矢取直義本輔嗣平易可從

得黃金 本義曰、金亦謂鈞金不若程傳黃中色金

剛物本之輔嗣

賁 本義曰、卦自損來自既濟來按圖相合輔嗣不信卦變然此註云、坤之上六來居二位乾之九二分居上位是又以此卦自泰來也

天文也 本義曰、先儒說天文上當有剛柔交錯四字按輔嗣曰、剛柔交錯而成文焉天之文也

六四 折中曰、程傳沿注疏之說本義又沿程傳之說皆以爲初四相賁而爲三所隔故未得其賁而鑑然也然朱子語類以无飾言之則亦自改其說

矣

未有與也 本義曰、言未大盛、程傳意同、按龔幼文
曰、六二陰柔中正、使上有陽剛之與、則必應之助
之、而不爲剝矣、唯其无與、所以于羣陰之中而
爲剝

剝之无咎 本義曰、去其黨而從正、无咎之道也是
以剝之爲句、无咎爲句、程傳曰、在剝之時爲无咎、
是以剝之无咎爲句、然傳本輔嗣、

復 本義曰、剝盡則爲純坤、十月之卦、而陽氣已生
于下矣、積之踰月、然後一陽之體始成、而來復、按

饒雙峰曰十月雖當純坤之卦而其時介乎剝復二卦之間以言乎前半月則有剝而未盡之陽小雪以前以言乎後半月則有復而方生之陽小雪以後剝之陽方盡于上而復之陽已生于下矣是鳥得爲无陽乎知十月之非无陽則四月之非无陰亦可知矣此陰陽消息之理至精至微程傳始發之然所言者其理耳而未有以驗其氣數之必然也朱子又從而推明之曰是當以一爻分三十分陰陽日進退一分剝之陽剝于九月之霜降而盡于十月之小雪復之陽則生于小雪而成于十

一月之冬至。夬之陰決于三月之穀雨，而盡于四月之小滿。姤之陰則生于小滿，而成于五月之夏。至於是理與數合，然後知陰陽絕續之際，果無一息之間，斷而程子之言爲益信矣。

七日來復 本義曰：五月姤卦，一陰始生。至此七爻而一陽來復，與程傳同。按此乃注疏褚氏、莊氏之說，輔嗣則用六日七分，詳後卷卦氣條。

无妄 本義曰：史記作无望。按史記朱英曰：代有无望之福，又有无望之禍。漢書谷永傳亦作无望應劭曰：天必先雲而後雷，雷而後雨。今無雲而雷，无

望者无所望也。馮厚齋曰：自文王以來，多爲无望之義。馬季長、鄭康成、王子雍皆同斯義。古人用字同聲者，義亦通之。如豫之爲預、履之爲禮、噬嗑之爲市合、不一而足。今觀卦內无所期望而得其義，多通序卦之意，非可如此推也。蓋動出于人，則爲之；而期其成有所望也。動而聽命于天，非可期望也。又曰：爲卦自訟而變，按圖无妄與訟相隔三位，非自訟來也。

不耕穫 程傳：不首造其事，卽注疏不敢發首而耕之意。然義實難通，已不首耕，誰當先之？不若本義。

嗣云剛過而中謂二也居陰過也處二中也專以一爻言之不合彖義

枯楊生梯 木義梯根也本之程傳康成作萬字與梯同輔嗣以爲楊之秀則與五爻生華相復

過涉滅項 程謂履險蹈禍之小人朱謂殺身成仁之君子與輔嗣志在救時之說同

習坎 榕村語錄曰坎上加一習字輔嗣云更習也最妙程朱不用而以重坎爲習坎那一卦不是重何獨坎卦孔子所云重險乃是解習字之意一重險過又一重險非更習而何不可以重字訓習字

以養人者。於下體則求其所以自養者。要在皆得正則吉爾。

靈龜輔嗣謂神靈明鑒之龜兆不合卦義故朱子從程傳以爲不食之物

六二 本義曰求養于上則往而得凶是以征凶專承下句於象傳曰初上皆非其類仍然總承兩義六三 本義曰既拂于頤雖正亦凶是以拂頤爲句程傳違拂于頤之正道是以拂頤貞爲句正與卦辭頤貞相反故後儒多從之然實本輔嗣

剛過而中 程朱謂四陽居中過盛以全卦言也輔

无私意期望之心。卽仁者之先難後獲也。
何天之衢 本義言何其通達之甚。程傳天之衢亨。
誤加何字。吳草廬以何作荷。猶詩言何天之休。何
天之龍。言其遇時之通也。

頤 胡雲峰曰。盤澗董氏嘗問朱子曰。本義謂觀頤。
觀其所養之道。自求口實。觀其所以養身之術。與
程傳以觀頤爲所以養人之道。自求口實爲所以
自養之道。如何。朱子沈吟良久曰。程傳似勝。蓋下
體三爻皆是自養。上體三爻皆是養人。先人而後
己者。君子觀頤之象。自上而下。於上體則觀其所

也

樽酒簋貳 本義從晁氏之說按姜氏寶曰觀孔子
小象以樽酒簋貳爲句則晁氏以貳用缶爲句者
非矣

履錯然 輔嗣謂敬慎之貌則與下文敬之爲複程
傳謂交錯蓋處應物之初也

九四 折中曰繼明者所謂有緝熙于光明其明不
息也與繼世之義全無交涉因先儒有以明兩爲
繼世者故程傳用說九四爻義與經意似遠

咸 本義咸自旅來按圖相合

執其隨。本義隨下二爻。程傳隨上。然隨之爲道。取于雁行相從。觀隨卦初剛隨二柔。五剛隨上柔可見。故折中謂以三隨四。四者心位。心動則形隨之。志末也。程傳云。淺末本于輔嗣。本義謂不能感物。卽淺末之說也。按易例。初爲本。上爲末。李鼎祚謂五志感于上者是。

恒。本義恒自豐來。按圖相距甚遠。

不恒其德。本義過剛不中。按易最重者中德。故程子曰。中重于正。中則正矣。正不必中也。邱建安曰。恒卦六爻。無上下相應之義。惟以二體而取中焉。

中則能恒。不中則不恒矣。

小利貞 本義以小爲小人易无此例。不若程傳不可大貞而尚利小貞。卽正義危行言孫之說。

不惡而嚴 本義讀如善惡之惡。張子讀如憎惡之惡。

六二 本義必遯之志。程傳與五相應固結而不可解。正義羈縻善類而不使去其說。有三。

繫遯 本義下比二陰。沈良思曰：一爻只比一爻。若程傳三與二切比之善。

好遯 本義讀好惡之好。去聲折中讀美好之好。上

聲

小人否 本義以否爲不深合卦義輔嗣音減否之否折中謂否泰之否均屬支離

君子用罔 本義視有如无卽程傳蔑視于事而无所忌憚之意豈君子之道哉胡翼之謂罔而不用其壯深合小象

六五 本義卦體似兌有羊象按語類云中孚是箇雙夾的離小過是箇雙夾的坎此云似兌以雙夾言也來知德通謂之大象

晉 本義自觀而來按圖相合

六二 或問王母指六二以爲享先妣之吉占何也

朱子曰恐是如此。蓋周禮有享先妣之禮。

未受命也 本義未有官守之命與傳同輔嗣折中

謂與臨二同當其臨也至誠感物如忘其勢當其進也。守道優游若將終身故一則曰未順一則曰未受。

用拯馬壯 折中與豐二同皆以救昏爲義然卦義

艱貞惟三以剛應上有除害之象餘四爻皆以避害爲義程傳自免有道卽正義徐徐用馬以自拯濟之說。

入于左腹 程傳奸邪見信于其君朱子語類云下三爻皆說明夷是好底何獨此爻却作不好說故本義用輔嗣隨時避難之說而以爲得意遠去

睽 本義自離中孚家人而來按圖相合

蹇 本義自小過來按圖相合

往蹇來連 程朱連三苟爽承五然連三實以承五也

解 本義自升來按圖相合

負且乘 輔嗣乘二負四與大傳不合當從程傳小人宜負荷而乘車爲非據

已事遄往 本義輒所爲之事而速往以益之程傳
事旣已則速去之不居其功正義竟事速往乃得
无咎三說不同以爻義求之二尚利貞征凶初豈
遽舍已從人正義爲優

六五 本義或以此益之而不能辭是以或益之十
字爲句輔嗣或益之爲句十朋之龜弗克違爲句
後儒多從之

十朋之龜 漢食貨志五貝爲朋乃古法也其云二
貝爲一朋乃新莽所定本義兩龜爲朋當是援此
而誤貝字爲龜字

勿問之矣。本義不問而元吉可知，以爲決之之詞。
程王并同。呂東萊謂誠心惠民，不須問民之惑。深
合象傳。

孚號 程傳：命衆之辭，卽正義號令之說也。二曰惕
號，上曰无號，則本義作呼號爲是。

居德則忌 輔嗣居德明禁之說，於理未洽。程子從
之，朱子以爲未詳。張中溪、李隆山、項平菴、胡雲峰
皆以居爲積，積而不散，則在所忌，又與施祿及下
之義相複，故折中用呂刑敬忌之說。

九二 本義惕號爲句。按小象有戎勿恤，則惕號莫

夜爲句

九四 本義居則不安行則不進用正義語

覓陸 傳義皆爲一物本之輔嗣語類云是兩物覓者馬齒覓陸者草陸一名商陸乃董遇之說无號 傳義皆謂小人窮極无所呼號東坡云无號者不警也卽彖傳孚號之反

姤之時義大矣哉 吳敬齋曰程傳重遇字耑以遇之善者言本義重制字耑以遇之不善者言竊意此語總承上文兩端而言

金柅 柅所以止車朱子本輔嗣輔嗣本馬融程子

亦用之王肅則以爲織績之器

柔道牽也 程傳不促其行是以牽爲進折中曰凡言牽者自小畜至此皆當爲牽制之義

包有魚 本義制之在已然必有包容之量而後可以制之輔嗣以包爲庖厨之庖甚无義理

萃亨 本義亨字衍文項平菴曰卦名下元无亨字獨王肅本有王弼遂用其說孔子彖辭初不及此字

有孚不終 本義隔於二陰程傳三陰聚處輔嗣應在四而三承之錢爾卓曰比初有孚一於五也萃

初與四正應然有二陽焉不終于四也

禴

傳義謂祭之簡簿者輔嗣云殷春祭名按周禮

大宗伯以禴夏享先王非春也

往无咎 傳義從輔嗣往從上六之說然萃者萃于

陽也當近而從四

升 本義自解來按圖相合

順德 朱子以順爲慎程傳君子觀升之象以順修其德積累微小以至高大也諸儒從之

上合志也 程傳上爲九二呂與叔謂上三陰

升階 本義升之易者李元量曰升而有序故以階

言之蓋君子之進以禮者也

困六三 本義三宮六妻不可亭曰三陽位非六之所安也程傳以妻爲所安之主明三位爲妻六爲夫也本義未當

井收 朱子從晁氏盧鹿收繕之說正義曰凡物可收成者則謂之收如五穀之有收也

小人革面 傳義皆謂但革其面折中謂井革其心按堯有四凶舜有三苗則革心未易言也

鼎元吉亨 本義吉衍文也按彖傳无吉字誠衍文得妾以其子 本義得妾而因得其子輔嗣說也程

傳子主也以其子致其主於无咎也是以子爲內
子以爲左右之也其義甚長

我仇有疾 本義以仇爲初伊川輔嗣謂五折中不
必定指一爻

其形渥 本義從晁氏爲刑剝諸儒皆從舊說爲沾
濡之貌

不喪七鬯 本義曰程子以爲適也下脫不喪七鬯
四字按王伯厚云范誘昌證墜簡震象辭脫不喪
七鬯四字程子取之

出可以守宗廟社稷 本義出謂繼世主祭蓋卽帝

出乎震之出正義謂出則撫軍非也

六二 本義億字未詳程傳度也九陵九陵極言其高耳七爲少陽
義未詳按互艮爲陵九陵極言其高耳七爲少陽
之數此爻與既濟二爻皆爲陰爻陰極變陽則爲
七故其象同其辭亦同程子謂卦位有六七乃更
始蓋卽極而必變之意也

艮其止 本義晁氏云艮其止當依卦辭作背按輔
嗣曰易背爲止以明背卽止也

以中正也 本義正字美文叶韻可見細讀艮是
漸 本義自渙與旅來按闡相合

漸之進也 本義之字疑衍折中以別于晉之進升
之進也

君子以居賢德善俗 本義疑賢字衍或善下有脫
字按程傳君子觀漸之象以居賢善之德化美于
風俗則非衍也又正義君子求賢德使居位化風
俗使清善亦通

鴻漸于陸 本義胡氏程氏皆謂陸當作遼按王伯
厚曰范誇昌證墜簡漸上六疑陸字誤胡安定取
之

歸妹以須 本義女之賤者折中引熊過之說謂天

官書以須女四星爲賤妾之稱按須女卽女土蝠
可單稱女未有單稱須者此說非也陳平傳樊噲
乃呂后弟呂嬃之夫須與須通說文文字也楚辭
女嬃之嬃媛

雖旬无咎 程朱以旬爲均本之輔嗣安定胡氏曰
十日爲旬然周禮地官公旬無過三日鄭註亦云
旬均也

初六 本義卑巽之過榕村語錄曰巽訓卑巽始于
輔嗣殊爲附會巽者入也非謂一陰能入謂二陽
能入一陰以散之也

先庚後庚 本義丁癸之說本之康成程傳從輔嗣申命令謂之庚 榕村語錄曰今俗占雨暘以甲庚日十干氣候到此二日便須少變如歲之有春秋也 蠱是從頭變來故有取于甲 翼是從中間變故有取于庚

來兌 本義就下二陽折中物感我而來

引兌 本義引下二陽折中物引我而去

渙 本義變自漸卦按圖不合

九二 程傳二月初爲机初謂二爲馬按剛來而不窮專以二言則九奔而二机者是

六四 輔嗣渙爲句有丘匪夷所思爲句

渙王居 本義三字連讀與小象不合輔嗣曰爲渙之主唯王居之乃得无咎

上九 本義渙其血去爲句又云逃當作惕與小畜

六四同榕村語錄曰此逃出與惕出不同夫子以渙其血爲句而專釋之則明下當以去逃出爲句如樽酒簋貳之類皆是夫子分別句讀處也當渙之時在事中者則以渙其所利爲義在事外者則以渙其所害爲義

又誰咎也 本義此无咎與諸爻異言无所歸咎也

按爻辭言无咎者九十有九皆補過之辭
虞吉 傳義以虞爲度折中從項平菴以虞爲安輔
嗣曰虞猶專也卽安之意

九二 程傳不言子爲某爻本義以子爲五張紫巖
謂初折中從之

馬匹亡 本義初爲匹以與四應也輔嗣匹爲三以
與四比也

翰音登于天 本義信極而不知變與卦義不合程
傳音飛而實不從本之輔嗣

小過初六 本義郭璞洞林占得此者或致羽虫之

孽按雙湖胡氏撰啓蒙翼嘗引郭璞洞林云從王
楚翁才古抄得之則元時此書尚存今罕見矣又
或問本義彖傳謂致飛鳥遺音之應如何朱子曰
看這象似有羽虫之意如賈誼鵬鳥之類是
也

弗過遇之 本義兩說伊川輔嗣皆如前說折中從
後說與九三一例語類亦從後說

弗遇過之 本義遇過恐亦只當作遇過程傳曰不
與理遇動皆過之

亨小 本義亨小當爲小亨谷拙侯曰不曰小亨而

曰亨小言所亨者其小事也

婦喪其茀 勃輔嗣謂首飾傳義謂婦車之蔽按詩翟茀以朝則謂蔽車者是

繻有衣袽 本義程子曰繻當作濡本之輔嗣

九五 本義東隣爲五西隣爲二潘去華曰東西者彼此之詞不以五與二對言本之正義

小狐汔濟 程傳井卦訓汔爲幾此又訓汔故本義不從而皆曰幾

亦不知極也 本義極字爲敬字正義作極字解見

本註

上九 程傳本輔嗣飲酒而濡其首本義以飲酒爲縱而不反濡首爲狐之涉水而濡其首則一爻而爲兩截

剛柔相摩八卦相盪 本義兩相摩而爲四四相摩而爲八八相盪而爲六十四按此卽邵子一分爲二二分爲四四分爲八八分爲十六十六分爲三十二三十二分爲六十四明道先生所謂加倍法是也

天下之蹠 韓康伯以蹠爲幽深難見朱子語類云蹠襍亂也古無此字今从臣亦是口之義與左傳

實有繁言之噴同。是口裏說話多雜亂底意思所
以下文說不可惡。

亢龍有悔。本義此蓋重出。按此節爲上節謙之反
對。非重出也。

天一地二。本義此簡本在第十章之首。程子曰。宜
在此項。平菴曰。姚大老云。天一至地十班固律歷
志及衛元嵩元包運著篇皆在天數五之上。程朱
皆用此說。今從之爲是。

本義以此明河圖。按詩序有女同車爲刺。忽禾瓜
美。齊桓公朱子詩傳皆以經無明文而不從此節

之爲河圖亦無明文詳見本節

天數五 折中取龔幼文之說相得言四方相次如一三七九二四六八有合言四方相交如一六二七三八四九余謂相交可以言有合相次不可以言相得也朱子曰相得如兄弟有合如夫婦相得則取其奇偶之相爲次第辨其類而不容紊也有合則取其奇偶之相爲生成合其類而不容間也天一生水地六成之云云見于漢志郭白雲曰五行之說出于歷數之學非易之道也。

大衍之數 漢注疏所載京馬荀爽干支二十八宿之

說固屬支離。康伯推衍天地之數。唯用五十。亦是模糊。啓蒙最善。錄于本註。

其用四十有九。榕村語錄曰。聖人揲蓍而數學之精俱括于內。其根皆始于七。故勾股法。勾三股四爲勾股和。以無餘數也。七七四十九。未至七。不成比例。過七。又不成比例。以有零數也。凡開方。方圓相求。圍徑相求。無不始于七。方徑七二十八。圍徑七二十二。爲密率。以此爲例。卦乃乘數。蓍乃除數。卦揲。朱子以奇爲揲餘。郭子和引張子謂所掛之一。一虞翻說同。折中從之。

乾之策 本義太陽居一而連九少陰居二而連八
少陽居三而連七太陰居四而連六按語類云古
人做易其巧不可言元來只是十數太陽居一除
了本身便是九個少陰居二除了本身便是八個
少陽居三除了本身便是七個太陰居四除了本
身便是六個這處都不有人見得

七八九六之數歸震川何元子皆以過揲之數言
之如老陽四九三十六少陰四八三十二少陽四
七二十八老陰四六二十四其理甚明朱子以揲
餘言之者蓋畫卦生爻用揲餘不用過揲也奇書

一耦畫一。如掛扱三奇，則含乾象。掛扱兩奇一偶，則含巽離兌。掛扱兩耦一奇，則含坎震艮。掛扱三耦，則含坤。此其自然之法象，皆于揲餘得之。若論過揲，則止有七八九六之數，不能具八卦之象。故啟蒙又以揲餘爲母，過揲爲子。

三用其全四用其半者，三奇爲圓。圓者徑一圍三。掛扱三奇，三也。兩偶一奇，除偶論奇，亦三也。是舉其全而用之也。掛扱三偶，四也。兩奇一偶，除奇論偶，亦四也。四偶爲方。方者徑一圍四，必四偶而後全。三偶一偶，故曰用半。蓋陽得兼陰，故用全。陰不

得兼陽故用半也

引伸觸類 木義凡四千九十六卦按此本之焦氏
易林一卦變爲六十四故有此數啓蒙卦變圖用
之

右第九章 本義其詳具于太卜筮人之官今不可
考按易爲完書其揲蓍求卦斷占之法求之大傳
而皆備詳後卷

兩儀生四象 本義陰陽太少本邵子之說正義謂
金木水火土分王四季又地中之別故唯云四象
文離穿鑿微宋儒何以正之

四象生八卦 程傳乾辭下解云聖人始畫八卦三才之道備矣因而重之以盡天下之變故六畫而成卦朱子曰程子說聖人始畫八卦不知聖人畫八卦時先畫甚卦這處便曉不得又曰程子之意只云三畫上疊成六畫八卦上疊成六十四耳

易有四象 正義兩儀生四象七八九六之謂也按七八卽少陽少陰九六卽老陽老陰可見邵子之說有所自來非創解也孔穎達之流所見不定故於此以七八九六爲四象於兩儀生四象又以金木水火爲四象不自覺其矛盾耳

易曰自天祐之 本義在此无所屬或恐是錯簡侯
果曰言人能依四象所示繫辭所告則天及人共
祐之蓋引此以証上文。

虞勝者也 張子以正爲勝朱子二者常相勝折中
從朱

何以守位曰仁 王伯厚曰何以守位曰人所謂后
非衆罔與守邦也釋文云桓玄明僧紹作仁今本
乃從桓玄誤矣本義作人云呂氏從古

十三卦象 本義於豫大壯大過夬皆以卦名取義
正義曰上繫云以制器者尚其象則取象不取名

也韓氏乃取名不取象其於義未善。

陽卦多陰 本義凡陽卦皆五畫凡陰卦皆四畫
此以掛扱之數言五爲奇四爲耦

吉之先見 本義漢書吉之之間有凶字按此楚元
王傳穆生之言也正義曰豫前知幾皆向吉而背
凶諸本或有凶字者其定本則無 後漢陳寵傳
註引此句亦有凶字

其稱名也 八卦伏羲所名朱子於乾卦顯言之至
屯則不敢定今讀繫傳其於中古其有憂患其衰
世之意蓋井鼎諸物上古未備意者文王所名

而微顯闡幽。本義而微顯恐當作顯而按諸家皆作微者使顯。幽者使明解而字不當顛倒。

開而。本義開而之而亦疑有悞。按開啓也。伏羲有

畫无文道未大啓。文王稱名繫辭易道大明故曰

開而。

易之興也。本義文王拘于羑里。按酈道元羑水出
蕩陰西北東流經羑城故羑里也。蓋卽今河南之
湯陰。

復小而辨于物。康伯曰微而辨之不遠復也。與陸
象山之說同。不若本義陽微而不亂于羣陰之合。

于卦象

出入以度外內使知懼 本義此句未詳康伯曰明
出入之度使物知外內之戒也

研諸侯之慮 康伯曰諸侯物主有爲者也能精爲
者之務此蓋曲說當從本義衍文

幽贊子神明而生蓍 本義据龜筴傳以生蓍爲叢
生滿百莖不若正義以爲生用蓍水卦之法

易逆數也 本義之說以伏羲八卦方位圖及大圓

圖陽順陰逆數之可見

五章六章 本義此章所推卦位之說多未詳者按

朱子旣以先天圖訓解諸章此卽文王八卦方位圖也。

第九章 本義揲蓍求爻語類乾求坤得震之類亦誤吳幼清之說得之啓蒙與吳說同

乾爲天 王伯厚謂釋文引荀爽九家集解得八卦逸象三十有一本義所引正與此合想亦從釋文得之苟易早亡朱子恐不及見

大過顛也 本義大過以下卦不反對或疑其錯簡按鄭康成云大過以下卦旨不協似錯亂失正弗敢改耳然則朱子之云或指康成也